

## Script of Morning Gojri News Bulletin 25 November 2025 at 1015Hrs

مارننگ گو جری نیوز بلیٹن مورخہ 25 نومبر 2025

\*\*\*\*\*

یوہ آکاشوانی جموں ہے باغ علی طاہر تیں خبر سنو۔

### CM Power Hike

وزیر اعلیٰ عمر عبداللہ نے کل اس گل نانہ واضع کیو ہے جے سرکار یوٹی مانہ بجلی کرایاں مانہ بابدو کرن گی کوئے تجویز نہیں ہے۔ انہاں نے ان اطلاعات نانہ بے بنیاد قرار دتو ہے، جن مانہ کہیو جا رہیو تھو جے سرکار بجلی غا بنیادی کرایاں ور 20 فیصدی سرچارج لان بارے غور کر رہی ہے۔ وزیر اعلیٰ نے ان اطلاعات نانہ قیا س آرائی قرار دیتاں واں صاف کیو ہے جے ایسی کوئی تجویز سرکار غے زیر غور نہیں ہے۔ انہاں نے صارفین نانہ یقین دوايو ہے جے سرکار عوام ور مزید اضافی بوجھ نہ پاتاں واں بجلی سپلائی مانہ بہتری غی کوشش جاری رکھے گی۔

-----

### Budget Proposals

مالی سال 27/2026 واسطے بجٹ تیار کرن گی کا روئی غا اک حصہ غا طور ور خزانہ محکمہ غی طرفوں بجٹ تجویزاں ور آئندہ پہلی دسمبر تیں بحث غو آغاز کیو جا رہیو ہے۔ آکاشوانی جموں غا نمائندہ نے دسیو ہے جے انتظامی سیکریٹریاں نانہ جانکاری دتی گئی ہے جے اس سلسلہ مانہ 36 محکماں سنگ بجٹ بارے 16 دسمبر توڑی غور کیو جائے گو۔ اس عرصہ غے دوران مالی سال 26/2025 واسطے نظر ثانی، جد کہ مالی سال 27/2026 غا بجٹ تیار کرن بارے تخمینہ، جس مانہ آمدنی خرچہ مرکزی اسکیمیں، پی ایم ڈی پی تے قرضہ وغیرہ غا حصاں ور غور کیا جان گی امید ہے۔ محکماں نانہ اس سلسلہ مانہ کی گئی کا روئیاں، قیام تے ایف آر بی ایم تفصیلات غے ہمراہ سٹافینگ بارے پی پی ٹیز، خرچہ غا رجحانات، ریسپٹ، بڑا پروجیکٹاں تے مالی ذمہ داریاں بارے کا روئی رپورٹ پیش کرن بارے کہیو گیو ہے۔

-----

### Artisan Awards

بتھ کھڈی تے دستکاری بارے محکمہ غی طرفوں آج سرینگر غا ایس کے آئی سی سی مانہ یوٹی آرٹسین ایوارڈز سال 2024 دتا جائیں گا۔ نائب وزیر اعلیٰ جہیڑا صنعت و تجارت محکمہ غا وی سربراہ ہیں انعام تقسیم کریں گا۔ محکمہ غا اک ترجمان نے اس بارے جانکاری دیتاں واں دسیو ہے جے 38 دستکاراں تے بُنکراں نانہ انعامات غی خاطر چُنیو گیو ہے، جن مانہ 18 جموں جد کہ 20 افراد وادی کشمیر تیں چُنیو گیا ہیں۔ ان انعامات مانہ سٹیشن تے 50 ہزار، 30 ہزار تے 20 ہزار روپیاں غا نقد انعام شامل ہیں۔ محکمہ غو کہنو ہے جے یہ انعام جموں کشمیر غی دستکاریاں غا ورثہ غا تحفظ غا اعتراف مانہ دتا جا رہیا ہیں۔

-----

## CS Constitution Day

چیف سیکریٹری آئل ٹٹلو نے کل جموں کشمیر مانہہ شاندار یوم آئن منایا جان با رے تیاریاں غو جائزو لیو۔ اس سال غا یوم آئن منایا جان سنگ آئن آپنا یا جان غا 75 بہرا پورا ہو جائیں گا۔ انہاں نے تمام محکمان نانہہ ہدایت کی ہے جے وے اس سلسلہ مانہہ پہلک یعنی 26 نومبر نانہہ پُر اثر سر گرمیاں غا منایا جان نانہہ یقینی بنا ویں،۔ ان سرگرمیاں غا منصوبہ مانہہ سویر 11 بجے اجتماعی طور ر ور تمہید پڑھن غے بعد تمام ضلعان غی سکول اسمبلیاں مانہہ آئن غا موضوعات ور فن دیوار تے سکرینگز وغیرہ غا مظاہرہ کیا جائیں گا۔ الے انصاف آزادی بروری تے پہائی چارہ غی خاطر چہل قدمی غو اہتمام کیو جائے گو۔ اس مہم غے تحت ریاست وار پہلاں تی ہی 5 ہزار 9 تقریبات دیکھی جا چکی ہیں۔ شہریاں نانہہ آئن لائن حلف لین تے سمویدان مقابلہ واسطے ترغیب دتی گئی ہے۔

-----

## Heritage Walk

وراثتی ہفتہ با رے جشن منایا جان غا اک حصہ غا طور ر ور محکمہ سیاحت جموں غی طرفوں ضلع انتظامیہ جموں غا تعاون سنگ تاریخی مبارک منڈی کمپلیکس تیں امر محل پبلک توڑی آج سویرے اک ہیرٹیج واک غا ناں سنگ اک چہل قدمی غو اہتمام کیو گیو۔ اس چہل قدمی غو مقصد مقامی ثقافت، تاریخ تے جامع سیاحت نانہہ فروغ دینو ہے۔ اس چہل قدمی نانہہ مبارک منڈی تیں چنڈی دس غے روانہ کیو گیو۔ اس واک مانہہ مقامی افراد، طالب علم، محکمہ سیاحت سنگ منسلک افراد شامل ہوا، تے انہاں نانہہ تاریخی جگہاں با رے واقف کراتاں واں علاقہ غی وراثت تے اُس غا رکھ رکھائو با رے اہمیت نانہہ اُجاگر کیو گیو۔

-----

## Transport Guidelines

محکمہ ٹرانسپورٹ نے جموں کشمیر مانہہ گڈیاں غی رجسٹریشن یعنی اندراج نالے ڈیلراں نانہہ اختیار دین غا سلسلہ مانہہ نواں رہنما سطور جاری کیا ہیں۔ ان رہنما سطور غے مطابق گڈیاں نانہہ دوبارہ فروخت کرن، ذخیرہ کرن یاہ ان درج شدہ گڈیاں غا استعمال مانہہ شامل ڈیلراں غی اختیار دیہی نانہہ ضروری بنایو گیو ہے۔ ان ڈیلراں غی ڈیجیٹل شناخت واپن پلیٹ فارماں غے ذریعے واضح کی جائے گی۔ ان مانہہ ان لائن درخواست دین، پریمسس غی ویرفیکیشن 5 سال غی ویلی ڈیٹی غو اختیار دینو ریلٹو رپورٹینگ تے کے وائی سی غی سختی سنگ پابندی کرنو شامل کیو گیو ہے۔ ٹرانسپورٹ کمشنر وشیش مہاجن غو کہنو ہے جے اس کا روائی سنگ فراڈ ور قابو پایو جا سکے گو تے شفافیت مانہہ بابدو وے گو۔

-----

## Kabaddi India

خواتین کبڈی عالمی کپ غا فائنل مانہہ بھارت نے لگا تار دوجی بار جت درج کی جت اُس نے فائنل مانہہ چینی تا ئے نانہہ 28/35 نال شکست دتی ہے۔ بھارت نے گروپ مرحلہ مانہہ اپنا چا رے مقابلان مانہہ جت درج کی تھی، تے سیمی فائنل مانہہ اُس نے ایران نانہہ 21/33 نال شکست دتی تھی۔ جد کہ چینی تا ئے وی فائنل توڑی ناقابل شکست رہیو تھو۔ تے اُس نے سیمی فائنل مانہہ اُس نے میزبان بنگلہ دیش نانہہ 18/25 نال

شکست دتی تھی۔ اس ٹورنامنٹ مانہ 11 ملکاں نے شمولیت کی تھی۔ وزیر اعظم نریندر مو دی نے خواتین کبڈی عالمی کپ 2025 مانہ کامیابی حاصل کرن ور بھارتی ٹیم نانہ مبا رک با د پیش کی ہے۔ تے کہیو ہے جے اُن غی یاہ جت نوجوان کھلاڑیاں نانہ اُن غا خواب شرمندہ تعبیر کرن واسطے متاثر کرے گی۔

-----

اس غے نال ہی خبراں غو یوہ بلیٹن ختم ہوؤ۔